



AKUERDO DI KOALISHON

‘HUNTU KU KURASON PA E HENDE’

Konsiderando:

- I. Ku dia 15 di mart último entidat públiko di Boneiru a tene elekshon pa su konseho insular pa loke ta trata e periodo 2023 – 2027.
- II. Ku den e elekshon menshoná ‘Union Patriótiko Boneriano’ (UPB) i ‘Movementu di Pueblo Boneriano’ (MPB) a logra respektivamente 3 i 2 asiento di konseho insular, bon pa un mayoria den e órgano menshoná.
- III. Ku durante e periodo di gobernashon 2019 – 2023 partidonan menshoná a traha huntu den un koalishon, ku pa promé biaha desde 2007 a bai e trayektorio kompletu.
- IV. Ku ámbos partido a tuma tempu pa sinta tranquil na mesa, deliberá i dileñá un akuerdo pa e próksimo añanan, ku ta bon negoshá na bienestar di Boneiru.
- V. Ku ámbos partido ta pará pa forma un gobièmu sólido i efektivu pa e próksimo 4 aña.

Tumando na kuenta:

- I. E puntonan deskribí den e programanan di akshon di ámbos partido pa loke ta trata e elekshon pa konseho insular di Boneiru.

Ta yega na e siguiente palabrashon:

1. Partidonan ta akordá pa forma un koalishon ku awor aki ta konta ku sinku (5) asiento den konseho insular (tres asiento di UPB i dos di MPB).
2. E koalishon lo manifestá su apoyo pa ku nombramentu di diputadonan pa e “kolegio ehekutivo nobo”, en prinsipio pa kuater aña.
3. Konhuntamente lo yega na un repartishon di responsabilidat ku ta reflehá nos Bonaire su nesidatnan di awor. For di esaki partidonan ta repartí responsabilidatnan den forma ku kada grupo ta sinti su mes kómodo na bienestar di Boneiru.
4. Partidonan lo forma grupo di sosten ku lo asistí durante di trahamentu di e plan di gobernashon i lo fungi durante di gobernashon komo grupo di konseho riba petishon di nan diputadonan;
5. Partidonan ta bai atendé kon ta e mihó forma pa konseho insular funshoná efektivu teniendo kuenta ku reglanan i leinan.

6. Partidonan ta akordá ku tomo di desishonnan lo tuma lugá segun maneho stipulá, lei i reglanan vigente i bou di transparensia nesesario.
7. Disputanan i diferencia di opinion ku por surgi ta ser tratá en konhunto ku diputado(nan) den ámbito di e grupo di sosten di ámbos partido.
8. Dentro di e kuadro di responsabilidatnan di gobernashon lo krea un forma pa deliberá efektivamente riba e relashon entre Gobièrnu lokal i Gobièrnu Sentral (Reino). Tur esaki ku e meta fiho pa tur dos gobernashon ta kómodo ku un nivel general akseptabel di bida i provishon i tambe atministrashon efektivu ku nos lo tin di alkansá. Lo monitoriá i evaluá palabrashonnan hasi pa midi kumplimentu i analisá si ta kanando den un direkshon adekuá i kaminda nos derecho di outodeterminashon i identidat propio ta garantisá. Pa un ke otro ta mas direkto, efektivu i efisiente sirbi, partidonan ta di akuerdo pa nombra un forma di representashon direkto di Boneiru na Hulanda.
9. Tareanan riba tereno di bienestar sosial i desaroyo sosioekonómiko lo risibí atenshon spesífiko pa logra un nivel hustu i aseptabel pa e siudadano. Algun prioridat ta: transporte públiko, un penshun básiko akseptabel pa un i tur na Boneiru, bibienda pagabel, kuminda i alimento, awa, koriente i telekomunikashon pagabel i konfiabel.
10. Pa promové bienestar sosial, lo pone atenshon spesífiko na desaroyo di bon plannan di parselashon, otorgamentu rápido di terenonan pagabel i pèrmitnan pa stimulá konstrukshon propio.
11. Lo bai hasi uso di partnernan sosial eksistente òf lo bai krea nobo p'asina e plannan di gobièrnu por keda kargá ampliamente.
12. Partidonan ta palabrá ku konhuntamente lo eksplorá aktividatnan ekonómiko nobo i sostenibel, manera atraé institutonan pa edukashon vokashonal i edukashon haltu (riba nivel di HBO) i universitario.
13. Partidonan ta kumbiní pa instalá un direktorado ku ta atendé e áreanan di ekonomia en general.
14. Partidonan lo formulá puntonan spesífiko i konkreto pa proyektonan di impakto grandi den e konteksto di sostenibilitat i futuro di e isla, entre otro Salt Company i Bopec.
15. Invershonnan aselerá i konkreto den konstrukshon, mehorashon i mantenementu di e ret di kareteranan, na benefisio di seguridat di tur usuario di kareteranan, e aksesibilitat i sirkulashon.
16. Lo buska forman pa dirigí nos turismo den forma ku e ta sirbi nos hendenan i ku mínimo impakto negativo riba naturalesa, nos identidat i kultura.
17. Lo tin kuestion di desaroyo di bario pa promové koheshon sosial i vitalidat, ku renobashon adekuá di barionan.
18. Protekshon di nos naturalesa i nos patrimonio natural ta un prioridat haltu, tantu komo meta riba su mes i tambe na momentu di konsiderashon di proyektonan di desaroyo nobo.
19. Protekshon di Boneiru kontra e impakto di kambio di klima mester bira un tópiko importante pa e koalishon huntu ku e Gobièrnu Sentral (Reino);
20. E bienestar di animalnan te ainda ta un dominio sup-eksponé na Boneiru ku tur e konsekuensianan ku esaki ta trese kuné, entre otro peliger di seguridat di e animal pero tambe hende. E dosié di bienestar di animal lo keda ehekutá ku impakto konkreto i positivo.
21. Partidonan lo tene kuenta ku gruponan minoritario na Bonaire i lo kontrolá estriktamente trato di migrantenan, kaminda e punto di salida ta leinan di imigrashon hustu i balansá i un maneho korekto i efektivu di prosedura.

22. Partidonan ta akordá pa garantisá un maneho i planifikashon efektivu pa loke ta trata e kresementu di poblashon. Tur esaki den relashon ku e kresementu ekonómiko, e kapasidat i kalidat di provishonnan vital i impakto riba e vishon ‘kresementu ku mantenementu di naturalesa i propio kultura’.
23. Partidonan ta akordá pa huntu ku Gobièrnu Sentral (Reino) traha pa optimalisá e posibilidat di Boneiru pa proveé su mes kuminda i otro neseditnan básiko, entre otro dor di invertí den agrikultura i krio di bestia duradero.
24. Partidonan ta hasi lo máksimo pa “gobièrnu nobo” sintá dia 30 di aprel òf mas promé i despues di tres luna entregá un programa di gobernashon na Konseho Insular. E puntonan ariba akordá i otro puntonan di atenshon lo forma base di e programa di gobernashon aki.